



彩雲歸

中呂調

蘅皋向晚艤輕航卸雲帆水驛魚鄉當暮天霽色如晴
晝江練靜皎月飛光那堪聽遠村羌管引離人斷腸此
際恨浪萍風梗度歲茫茫堪傷朝歡暮散被多情賦
與淒涼別來最苦襟袖依約尙有餘香算得伊鴛衾鳳
枕夜永怎不思量牽情處惟有臨岐一句難忘

洞仙歌慢

中呂調

佳景留心慣况年少彼此風情非淺有笙歌巷陌綺羅
庭院傾城巧笑如花面恣雅態明眸回美盼同心綰算
國艷仙材翻恨相逢晚繾綣洞房悄悄繡被重重夜

永歡餘共有海誓山盟記得翠雲偷剪和鳴彩鳳于飛
燕向柳逕花陰攜手遍情眷戀問其間密約深憐事何
限忍聚散况已結深深願願人間天上暮雲朝雨長相
見

離別難 中呂調

花謝水流倏忽嗟年少光陰有天然蕙質蘭心美韶容
何啻值千金便因甚翠減紅衰纏綿香體都不勝任算
神仙五色靈丹無驗中路委瓶簪 人悄悄夜沈沈閉
香闥永棄鴛衾想嬌魂媚魄非遠縱鴻都方士也難尋
最苦是好景良天尊前歌笑空想遺音望斷處杳杳巫

峯十二千古暮雲深

擊梧桐 中呂調

香靨深深姿姿媚媚雅格奇容天與自識伊來便好看
承會得妖嬈心素臨岐再約同歡定是都把平生相許
又恐恩情易破難成未免千般思慮 近日書來寒暄
而已苦沒叨叨言語便忍得聽人教當擬把前言輕負
見說蘭臺宋玉多才多藝善詞賦試與問朝朝暮暮行
雲何處去

夜半樂 中呂調

凍雲黯淡天氣扁舟一葉乘興離江渚渡萬壑千巖越

溪深處怒濤漸息樵風乍起更聞商旅相呼片帆高舉
泛畫鷁翩翩過南浦望中酒旆閃閃一簇烟村數行
霜樹殘日下漁人鳴榔歸去敗荷零落衰楊掩映岸邊
兩兩三三浣紗遊女避行客含羞笑相語到此因念
繡閣輕拋浪萍難駐歎後約丁寧竟何據慘離懷空恨
歲晚歸期阻凝淚眼杳杳神京路斷鴻聲遠長天暮

祭天神 中呂調

歎笑筵歌席輕拋驪背孤城幾舍烟村停畫舸更深釣
叟歸來數點殘燈火被連綿宿酒醺醺愁無那寂寞
擁重衾臥又聞得行客扁舟過篷窗近蘭棹急好夢還

驚破念平生單栖蹤跡多感情懷到此厭厭向曉披衣
坐

過澗歇 中呂調

淮楚曠望極千里火雲燒空盡日西郊無雨厭行旅數
幅輕帆漸落檣棹蒹葭浦避畏景兩兩舟人夜深語
此際爭可便恁奔名競利去九衢塵裏衣冠冒炎暑回
首江鄉月觀風亭水邊石上幸有散髮披襟處

安公子 中呂調

長川波瀲灩楚鄉淮岸迢遞一霎烟汀雨過芳草青如
染驅驅攜書劔當此好天好景自覺多愁多病行役

詞譜金
心情厭 望處曠野沈沈暮雲黯黯行侵夜色又是急
槳投村店認去程將近舟子相呼遙指漁燈一點

菊花新

中呂調

欲掩香幃論繾綣先歛雙蛾愁夜短催促少年郎先去
睡鴛衾圖暖 須臾放了殘針線脫羅裳恣情無限留
取帳前燈時時待看伊嬌面

望漢月

平調

明月明月明月何事乍圓還缺恰如年少洞房人歡會
依前離別 小樓凭檻處正是去年時節千里清光又
依舊奈夜永厭厭人絕

歸去來

平調

初過元宵三五慵困春情緒燈月闌珊嬉遊處遊人盡
厭歡聚 憑仗如花女持盃謝酒朋詩侶餘醒更不禁
香醕歌筵舞且歸去

燕歸梁

平調

織錦裁篇寫意深字值千金一回披翫一愁吟腸成結
淚盈襟 幽歡已散前期遠無聊賴是而今密憑歸燕
寄芳音恐冷落舊時心

透碧霄

南呂調

月華邊萬年芳樹起祥烟帝居壯麗皇家熙盛景運當

千端門清晝觚稜照日雙闕中天太平時朝野多歡遍
錦街香陌鈞天歌吹闌苑神仙 昔觀光得意狂遊風
景再覩更精妍傍柳陰尋花逕空恁鞦韆垂鞭樂遊雅
戲平康艷質應也依然仗何人多謝嬋娟道宦途蹤跡
歌酒情懷不似當年

木蘭花慢

南呂調

倚危樓竚立乍蕭索晚晴初漸素景衰殘風砧韻冷霜
葉紅疎雲衢見新雁過奈佳人自別阻音書空遣悲秋
念遠寸腸萬恨縈紆 陪都暗想歡遊成往事動欷歔
念對酒當歌低幃竝枕翻恁輕孤歸途縱凝望處但斜

陽暮靄滿平蕪贏得無言悄悄凭闌盡日踟躕

又

坼桐花爛漫乍疎雨洗清明正艷杏燒林緗桃繡野芳
景如屏傾城盡尋勝去驟雕鞍紺幘出郊坰風暖繁絃
脆管萬家競奏新聲 盈盈鬪草踏青人艷冶遞逢迎
向路旁往往遺簪墜珥珠翠縱橫歡情對佳麗地任金
罍罄竭玉山傾拚却明朝永日畫堂一枕春醒

又

古繁華茂苑是當日帝王州詠人物鮮明土風細膩曾
美詩流尋幽近香逕處聚蓮娃釣叟簇汀洲晴景吳波

練靜萬家綠水朱樓 凝眸乃睠東南思共理命賢侯
繼夢得文章樂天惠愛布政優優鰲頭況虛位久遇名
都勝景且淹留贏得蘭堂醞酒畫船攜妓歡遊

臨江仙引 南呂調

渡口向晚乘瘦馬陟崇岡西郊又送秋光對暮山橫翠
襯殘葉飄黃憑高念遠素景楚天無處不淒涼 香閨
別來無信息雲愁雨恨難忘指鳳城歸路但烟水茫茫
凝情望斷淚眼盡日獨立斜陽

又

上國去客停飛蓋促離筵長安古道綿綿見岸花啼露

對堤柳愁烟物情人意向此觸目無處不淒然 醉擁
征驂猶竚立盈盈淚眼相看况繡幃人靜更山館春寒
今宵怎向漏永頓成兩處孤眠

瑞鷓鴣 南呂調

寶髻瑤簪嚴妝巧天然綠媚紅深綺羅叢裏獨逞謳吟
一曲陽春定價何啻值千金傾聽處王孫帝子鶴蓋成
陰 凝態掩霞襟動檀板聲聲怨思難任嘹亮處迴壓
絃管低沈時恁回眸歛黛空役五陵心須信道緣情寄
意別有知音

憶帝京 南呂調

薄衾小枕涼天氣乍覺別離滋味展轉數寒更起了還
重睡畢竟不成眠一夜長如歲也擬把却回征轡又
爭奈已成行計萬種思量多方開解只恁寂寞厭厭地
繫我一生心負你千行淚

如魚水 仙呂調

輕靄浮空亂峯倒影瀲灩十里銀塘遶岸垂楊紅樓朱
閣相望菱荷香雙雙戲灘鷓鴣鴛鴦乍雨過蘭芷汀洲望
中依約似瀟湘風淡淡水茫茫搖動一片晴光畫舫
相將盈盈紅粉清商紫薇郎修禊飲且樂仙鄉便歸去
遍歷蠻坡鳳沼此景也難忘

玉蝴蝶 仙呂調

望處雲收雨斷凭闌悄悄目送秋光晚景蕭疎堪動宋
玉悲涼水風輕蘋花漸老月露冷梧葉飄黃遣情傷故
人何在烟水茫茫難忘文期酒會幾孤風月屢變星
霜海濶山遙未知何處是瀟湘念雙燕難憑遠信指暮
天空識歸航黯相望斷鴻聲裏立盡斜陽

又

漸覺芳郊明媚夜來膏雨一洒塵埃滿目淺桃深杏露
染烟裁銀塘靜魚鱗簾展烟岫翠龜甲屏開殷晴雷雲
中鼓吹遊遍蓬萊徘徊隼旟前後三千珠履十二金

叙雅俗熙熙下車成宴盡春臺好雍容東山妓女堪笑
傲北海尊疊且追陪鳳池歸去那更重來

又

是處小街斜巷爛遊花館連醉瑤卮選得芳容端麗冠
絕吳姬絳唇輕笑歌盡雅蓮步穩舉措皆宜出屏幃倚
風情態約素腰肢 當時綺羅叢裏知名雖久識面何
遲見了千花萬柳比並不如伊未同歡寸心暗許欲話
別纖手重攜結前期美人才子合是相知

又

誤入平康小巷畫檐深處朱箔微褰羅綺叢中偶認舊

識嬋娟翠眉開嬌橫遠岫綠髻鞦韆濃染春烟憶情牽粉
墻曾恁窺宋三年 遷延珊瑚筵上親持犀管旋疊香
牋要索新詞殢人含笑立尊前按新聲歌喉漸穩想舊
意波臉增妍苦留連鳳幃鴛枕忍負良天

又

淡蕩素商行暮遠空雨歇平野烟收滿目江山堪助楚
客冥搜素光動雲濤漲晚紫翠冷霜巘橫秋景清幽渚
蘭香謝汀樹紅愁 良儔西風吹帽東籬攜酒共結懽
遊淺酌低吟坐中俱是飲家流對殘暉登臨休歎賞令
節酩酊方酬且相留眼前尤物盍裏忘憂

滿江紅 仙呂調

暮雨初收長川靜征帆夜落臨島嶼蓼烟疎淡葦風蕭
 索幾許漁人飛短艇盡將燈火歸村落遣行客當此念
 回程傷漂泊 桐江好烟漠漠波似染山如削遶嚴陵
 灘畔鷺飛魚躍游宦區區成底事平生況有雲泉約歸
 去來一曲仲宣吟從軍樂

又

訪雨尋雲無非是奇容艷色就中有天真妖麗自然標
 格花發姿顏歡喜面細追想處皆堪惜自別來幽怨與
 閑愁成堆積 鱗鴻阻無信息魂夢斷難尋覓儘思量

休又怎生休得誰恁多情憑向道從來相見還相憶便
 不成長遣似如今輕拋擲

洞仙歌慢 仙呂調

乘興閑泛蘭舟渺渺烟波東去淑氣散幽香滿蕙蘭江
 渚綠蕪平畹和風輕暖曲岸垂楊隱隱隔桃花塢芳樹
 外閃閃酒旗遙舉 羈旅漸入三吳風景水村漁浦閑
 思更遶神京拋擲小會幽歡何處不堪獨倚危樓凝情
 西望日邊繁華地歸程阻空自歎當時言約無據傷心
 最苦竚立對碧雲將暮關河遠怎奈向此時情緒

引駕行 仙呂調

紅塵紫陌斜陽暮草長安道是誰人斷魂處迢迢匹馬
西征新晴韶光明媚輕烟淡薄和風暖望花村路隱映
搖鞭時過長亭愁生傷鳳城仙子別來千里重行行又
記得臨岐淚眼濕蓮臉盈盈銷凝花朝月夕最苦冷
落銀屏想媚容耿耿無眠屈指已算回程相縈空萬般
思憶爭如歸去覩傾城向繡幃深處並枕說如此牽情

望遠行 仙呂調

長空降瑞寒風剪淅淅瑤華初下亂飄僧舍密洒歌樓
迤邐漸迷鴛瓦好是漁人披得一蓑歸去江上晚來堪
畫滿長安高却旗亭酒價幽雅乘興最宜訪戴泛小

棹越溪瀟洒皓鶴奪鮮白鷗失素千里廣鋪寒野須信
幽蘭歌斷同雲收盡別有瑤臺瓊榭放一輪明月交光
清夜

八聲甘州 仙呂調

對瀟瀟暮雨洒江天一番洗清秋漸霜風淒緊關河冷
落殘照當樓是處紅衰綠減冉冉物華休惟有長江水
無語東流不忍登高臨遠望故鄉渺邈歸思難收歎
年年蹤跡何事苦淹留想佳人妝樓長望誤幾回天際
識歸舟爭知我倚闌干處正恁凝愁

臨江仙慢 仙呂調

夢覺小庭院冷風浙浙疎雨蕭蕭綺窗外秋聲敗葉狂
飄心搖奈寒漏永孤幃悄淚燭空燒無端處是繡衾鴛
枕閉過清宵 蕭條牽情繫恨爭向年少偏饒覺新來
憔悴舊日風標魂銷念歡娛事烟波阻後約方遙還經
歲問怎生禁得如許無聊

竹馬子 呂呂調

登孤壘荒涼危亭曠望靜臨烟渚對雌霓挂雨雄風拂
檻微收煩暑漸覺一葉驚秋殘蟬噪晚素商時序覽景
想前歡指神京非霧非烟深處 向此成追感新愁易
積故人難聚憑高盡日凝竚贏得銷魂無語極目霽靄

霏微暝鴉零亂蕭索江城暮南樓畫角又逐殘陽去

望海潮 仙呂調

東南形勝江湖都會錢唐自古繁華烟柳畫橋風簾翠
幕參差十萬人家雲樹遶堤沙怒濤捲霜雪天塹無涯
市列珠璣戶盈羅綺競豪華 重湖疊巘清佳有三秋
桂子十里荷花羌管弄晴菱歌泛夜嬉嬉釣叟蓮娃干
騎擁高牙乘醉聽簫鼓吟賞烟霞異日圖將好景歸去
鳳池誇

小鎮西 仙呂調

意中有箇人芳顏二八天然俏自來奸黠最奇絕是笑

時嬌靨深深百態千嬌再三偎着再三香滑 久離缺
夜來魂夢裏尤花帶雪分明似舊家時節正懽悅被雞
聲喚起一場寂寞無眠向曉空有半窻殘月

小鎮西犯 仙呂調

水鄉初禁火青春未老芳菲滿柳汀烟島波際紅幃縹
緲盡杯盤小歌被襖聲聲諧楚調 路繚繞野橋新市
裏花穠妓好引遊人競來歡笑酩酊誰家年少任玉山
倒家何處落日眠芳草

迷神引 仙呂調

一葉扁舟輕帆捲暫泊楚江南岸孤城暮角引胡笳怨

水茫茫平沙雁旋驚散烟斂寒林簇畫屏展天際遙山
小黛眉淺 舊賞輕拋到此成遊宦覺客程遙年光晚
異鄉風物忍蕭索當愁眼帝城賒秦樓阻旅魂亂芳草
連空濶殘照滿佳人無消息斷雲遠

促拍滿路花 仙呂調

香靨融春雪翠髻鞦秋烟楚腰纖細正笄年鳳幃夜短
偏愛日高眠起來貪顛奩只恁殘却黛眉不整花鈿
有時攜手閑坐偎倚綠窻前溫柔情態儘人憐畫堂春
過悄悄落花天長是嬌癡處尤殢檀郎未教坼了秋千

六么令 仙呂調

淡烟殘照搖曳溪光碧溪邊淺桃深杏迤邐染春色昨夜扁舟泊處枕簟當灘積波聲漁笛驚回好夢夢裏欲歸怎歸得展轉翻成無寐因此傷行役思念多嬌多嬌咫尺千山隔都爲深情密愛不忍輕離拆好天良夕鴛帷寂靜算得也應暗思憶

剔銀燈

仙呂調

何事春工用意繡畫出萬紅千翠艷杏天桃垂楊芳草各鬪雨膏烟膩如斯佳致早晚是讀書天氣漸漸園林明媚便好安排歡計論籃買花盈車載酒百琲千金邀妓何妨沈醉有人伴日高春睡

紅窗睡

仙呂調

如削肌膚紅玉瑩舉措有許多端正二年三歲同鴛寢表溫柔心性別後無非良夜永如何向名牽利役歸期未定算伊心裏却冤人薄倖

臨江仙

仙呂調

鳴珂碎撼都門曉旌幢擁下天人馬搖金轡破香塵壺漿盈路歡動帝城春揚州曾是追遊地酒臺花徑仍存鳳簫依舊月中聞荆王魂散應認嶺頭雲

鳳歸雲

仙呂調

向深秋雨餘爽氣肅西郊陌上夜闌襟袖起涼颼天末

殘星流電未滅閃閃隔林梢又是曉雞聲斷陽烏光動
漸分山路迢迢 驅驅行役冉冉光陰蠅頭利祿蝸角
功名畢竟成何事漫相高拋擲林泉狎翫塵土壯節等
閑銷幸有五湖烟浪一船風月會須歸老漁樵

女冠子 仙呂調

淡烟飄泊鶯花謝清和院落樹陰密翠葉成幄麥秋霽
景夏雲忽變竒峯倚寥廓波暖銀塘漲綠新萍魚躍想
端憂多暇陳王是日嫩苔生閣 正鑠石天高流金晝
永楚榭光風轉蕙披襟處波翻翠幕以文會友沈李浮
瓜忍輕諾別館清閑避炎蒸豈須河朔但尊前隨分雅

歌艷舞盡成歡樂

玉山枕 仙呂調

驟雨新霽蕩原野清如洗斷霞散彩殘陽倒影天外雲
峯數朶相倚露莎烟芰滿池塘見次第幾番紅紫當是
時河朔飛觴避炎蒸想風流堪繼 晚來高樹清風起
動簾幕生秋氣畫樓晝寂蘭堂夜永舞艷歌姝漸任羅
綺訟閑時泰足風情便爭奈雅歡都廢省教成幾闋新
歌盡新聲好尊前重理

減字木蘭花 仙呂調

花心柳眼郎似遊絲常惹絆獨爲誰憐繡線金針不喜

穿 深房密讌爭向好天多聚散綠鎖窻前幾日春愁
廢管絃

甘州令 仙呂調

凍雲深淑氣淺寒欺綠野輕雪伴早梅飄謝艷陽天正
明媚却成瀟洒玉人歌畫樓酒對此早驟增高價 賣
花巷陌放燈臺榭好時代怎生輕捨賴和風蕩霽靄廊
清良夜玉塵鋪桂莖滿素光裏更堪遊冶

西施 仙呂調

苧蘿妖艷世難偕善媚悅君懷後庭恃愛寵盡使絕嫌
猜正恁朝懽暮宴情未足早江上兵來 捧心調態軍

前死旋羅綺變塵埃至今想怨魂無主尙徘徊夜夜姑
蘇城外當時月但空照荒臺

河傳 仙呂調

翠深紅淺愁蛾黛蹙嬌波刀剪竒容妙技互逞舞裯歌
扇妝光生粉面 坐中醉客風流慣尊前見特地驚狂
眼不似少年時節千金爭選相逢何太晚

又

淮岸向晚圓荷向背芙蓉深淺仙娥畫舸露影紅芳交
亂難分花與面 采多乍覺輕舸滿呼歸伴急漿烟波
遠隱隱棹歌漸被蒹葭遮斷曲終人不見

傾盃 黃鐘調

水鄉天氣洒蒹葭露結寒生早客館更堪秋杪空堦下
木葉飄零颯颯聲乾狂風亂掃無緒人靜酒初醒天
外征鴻知送誰家歸信穿雲悲叫 蛩響幽窻鼠窺寒
硯一點銀釭閑照夢枕頻驚愁衾半擁萬里歸心悄悄
往事追思多少贏得空使方寸攪夢斷不成眠此夜厭
厭就中難曉

又 大石調

金風澹蕩漸秋光老清宵永小院新晴天氣輕烟乍斂
皓月當軒練淨對千里寒光念幽期阻當殘景早是多

愁多病那堪細把舊約前歡重省 最苦碧雲信斷仙
鄉路杳歸鴻難倩每高歌強遣離懷奈恹咽翻成心耿
耿漏殘露冷空贏得悄悄無言愁緒終難整又是立盡
梧桐清影

塞孤 般涉調

一聲雞又報嚴更歇秣馬巾車催發草草主人燈下別
山逕險新霜滑瑤珂響起棲烏金鐙冷敲殘月漸西風
緊襟袖淒冽 遙指白玉京望斷黃金闕遠道何時行
徹算得佳人凝恨切應念念歸時節相見了執柔荑幽
會處偎香雪免鴛衾兩恁虛設

瑞鷓鴣 般涉調

天將奇艷與寒梅乍驚繁杏臘前開暗想花神巧作江南信鮮染燕支細剪裁壽陽妝罷無端飲凌晨酒入香腮恨聽烟塢深中誰恁吹羌笛逐風來絳雪紛紛落翠苔

又

三吳嘉景古風流渭南往歲憶來遊西子方來越相功成去千里滄波一葉舟至今無限盈盈者盡來拾翠芳洲最好簇簇寒林遙認南朝路晚烟收三兩人家古渡頭

洞仙歌慢

般涉調

嘉景况少年彼此爭不雨沾雲惹奈傅粉英俊夢蘭品雅金絲帳暖銀屏亞竝粲枕輕倚綠嬌紅姹算一笑百琲明珠非價閑暇每只向洞房深處痛憐極寵似覺此子輕孤早恁背人沾洒從來嬌縱多猜訝更對剪香雲夢深心同寫愛印了雙眉索人重畫忍負艷冶斷不
等閑輕捨鴛衾下願常恁好天良夜

安公子

般涉調

遠岸收殘雨雨殘稍覺江天暮拾翠汀洲人寂靜立雙雙鷗鷺望幾點漁燈掩映蒹葭浦停畫橈兩兩舟人語

道去程今夜遙指前村烟樹 遊宦成羈旅短檣吟倚
閒凝竚萬水千山迷遠近想鄉關何處自別後風亭月
榭孤歡聚剛斷腸惹得離情苦聽杜宇聲聲勸人不如
歸去

又

夢覺清宵半悄然屈指聽銀箭惟有床前殘淚燭悄啼
紅相伴暗惹起雲愁雨恨情何限從臥來展轉千餘遍
任數重鴛被怎向孤眠不暖 堪恨還堪歎當初不合
輕分散及至厭厭獨自箇却眼穿腸斷似恁地深情密
愛如何拚雖後約的有于飛願奈片時難過怎得如今

便見

玉樓春

林鐘商

杏花

剪裁用盡春工意淺蘸朝霞千萬蕊天然淡泞好精神
洗盡嚴妝方見媚 風亭月榭閑相倚紫玉枝梢紅蠟
蒂假饒花落未銷愁煮酒杯盤催結子

又海棠

東風催露干嬌面欲綻紅深開後淺日高梳洗甚時忺
點滴燕支勻未遍 霏微雨罷殘陽院洗出都城新錦
段美人纖手摘芳枝插在釵頭和鳳顫

又柳

黃金萬縷風牽細寒食初頭春有味殢烟尤雨索春饒
一日三眠誇得意章街隋岸歡遊地高拂樓臺低映
水楚王空待學風流餓損宮腰終不似

傾盃樂

水調

樓鎖輕烟水橫斜照遙山半隱愁碧片帆岸遠行客路
杳簇一天寒色野梅映雪數枝艷報青春消息年華夢
促音信斷聲遠飛鴻南北算伊別來無緒翠消紅減
雙帶長拋擲但淚眼沈迷看朱成碧惹閑愁堆積雨意
雲心酒情花態孤負高陽客恨難極和夢也多時閒隔

祭天神

歇指調

憶繡衾相向輕輕語屏山掩紅蠟長明金獸盛熏蘭炷
何期到此酒態花情頓孤負愁腸斷還是黃昏那更滿
庭風雨聽空階和漏碎聲鬪滴愁眉聚算伊還共誰
人爭知此冤苦念千里烟波迢迢前約舊歡省一向無
心緒

瑞鷓鴣

平調

此調應題鷓鴣天

吹破殘烟入夜風一軒明月上簾櫳因驚路遠人還遠
縱得心同夢未同情脈脈意沖沖碧雲歸去認無蹤
只應曾向前生裏愛把鴛鴦兩處籠

訴衷情

林鐘商

一聲畫角日西曛催促掩朱門不堪更倚妝閣腸斷已
銷魂 年漸晚雁空頻問無因思心欲碎愁淚難收又
是黃昏

歸去來 中呂調

一夜狂風雨花英墜碎紅無數垂楊漫結黃金縷儘春
殘縈不住 蝶稀蜂散知何處殢尊酒轉添愁緒多情
不慣相思苦休惆悵好歸去

梁州令 中呂宮

夢覺紗窗曉殘燈闇然空照因思前事苦縈牽離愁別
恨無限何時了 憐深定是心腸小往往成煩惱一生

惆悵情多感月不長圓春色易爲老

燕歸梁 中呂調

輕躡羅襪掩絳綃傳音耗若相招語聲猶顫不成嬌乍
得見兩魂銷 匆匆草草難留戀還歸去又無聊若諧
雨夕與雲朝得似箇有鬢鬢

夜半樂 中呂調

艷陽天氣烟細風暖芳草郊汀閑凝竚漸妝點亭臺參
差佳樹舞腰困力垂楊綠映淺桃穠李白嫩紅無數
度綺燕流鶯鬪相語 翠娥南陌簇簇躡影紅陰緩移
嬌步擡粉面韶容花光相妬絳綃袖舉雲鬟風顫半遮

檀口含羞背人偷顧競鬪草金釵笑爭賭 對此嘉景
頓覺銷凝惹成愁緒念解佩輕盈在何處忍良時孤負
少年等閑度空望極回首斜陽暮歎浪萍風梗如何去
紅板橋頭秋光暮淡日映烟方照寒溪蘸碧繞垂楊路
重分飛攜纖手淚如雨波急隋堤遠片帆舉倏忽年華
改尙期阻 暗覺春殘漸漸飄花絮好晚涼天長孤負
洞房閑掩小屏空無心覷指歸雲仙鄉杳在何處遙夜
香衾暖算誰與知他深深約記得否

右樂章集

迷神引 中呂調

惜春郎

玉肌瓊艷新妝飾好壯觀歌席潘妃寶釧阿嬌金屋應
也消得 屬和新詞多俊格敢共我勅敵恨少年枉費
疎狂不早與伊相識

鳳凰閣

匆匆相見懊惱恩情太薄霎時雲雨又拋却教我行思
坐想肌膚如削恨只恨相違舊約 相思成病那更瀟
瀟雨落斷腸人在闌干角山遠水遠人遠音信難託這
滋味黃昏更惡

西施

自從回步百花橋便獨處清宵鳳衾鴛枕何事等閑拋
蹤有餘香也似郎恩愛向日夜潛消 恐伊不信芳容
改將憔悴寫霜綃更憑錦字字字說情慘要識愁腸但
看丁香樹漸結盡春梢

過澗歇

酒醒夢纔覺小閣香灰成燼洞戶銀蟾移影人寂靜夜
永清寒翠瓦霜凝疎簾風動漏聲隱隱飄來轉愁聽
怎向心緒近日厭厭長似病鳳樓咫尺佳期杳無定展
轉無眠粲枕冰冷香虬烟斷是誰與把衾重整

早梅芳慢

海霞紅山烟翠故都風景繁華地譙門畫戟下臨萬井
金碧樓臺相倚菱荷浦淑楊柳汀洲映虹橋倒影蘭舟
飛棹遊人聚散一片湖光裏 漢元侯自從破虜征蠻
峻陟樞庭貴籌帷厭久盛年晝錦歸來吾鄉我里鈴齋
少訟宴館多權未周星便恐皇家圖任勲賢又作登庸
計

解連環 望梅

小寒時節正同雲暮慘勁風朝冽信早梅偏占陽和向
日處凌晨數枝先發時有香來望明艷遙知非雪展瓏
金嫩蕊弄粉素英旖旎清絕 仙姿更誰並列有幽光

聞詞金
照水疎影籠月且大家留倚闌干鬪綠醕飛看錦牋吟
閱桃李繁華料彼此芬芳俱別等和羹待用休把翠條
漫折

一寸金

井絡天開劍嶺橫雲控西夏地勝異錦里風光蠶市繁
華簇簇歌臺舞榭雅俗多遊賞輕裘俊靚妝艷冶當春
晝摸石池邊浣花溪上景如畫 夢應三刀橋名萬里
中和政多暇仗漢節攬 澄清高掩武侯勲業文翁風
化台鼎思賢久方鎮靜又還命駕空遺愛兩蜀山川異
日成佳話

長壽樂

繁紅嫩翠艷陽景裝點神州明媚是處朱門樓臺院落
絃管新聲騰沸恣遊人無限馳驟驕馬如流水競尋芳
選勝歸來向晚起通衢近遠香塵細細 太平世少年
時忍把韶光輕棄況有紅妝吳娃楚艷一笑千金何啻
向尊前舞袖飄雪歌響行雲止願長繩且把飛鳥繫住
好從容痛飲誰能惜醉

輪臺子

霧歛澄江烟鎖藍光碧彤霞襯遙天掩映斷續半空殘
壁孤村望處人寂寞聞鈞叟甚處一聲羌笛九疑山畔

才雨過斑竹作血痕
添色感行客翻思故鄉恨
因循阻隔路久沈消息
正老松古栢青如織
聞野猿啼愁聽得見釣舟初出芙蓉渡頭鴛鴦灘側
干名利祿終無益念歲歲間阻迢迢紫陌翠娥嬌艷
從別經今花開柳折傷魂魄怕利名牽役又怎忍把光景拋擲

十二時

晚晴初澹烟籠月風透蟾光如洗覺翠帳涼生秋思漸
入微寒天氣敗葉敲窗西風滿院睡不成還起更漏咽
滴破憂心萬感並生都在離人愁耳天怎知當時一
句做得十分縈繫夜永有時分明枕上覩着孜孜地燭

暗時酒醒元來還在夢裏睡覺來披衣獨坐萬種無
慘情意怎得伊來重諧連理再整餘香被祝告天發願
從今永無拋棄

白苧

繡簾垂畫堂悄寒風浙瀝遙天萬里黯淡同雲冪冪漸
紛紛六花零亂散空碧姑射宴瑤池把碎玉零珠拋擲
林巒望中高下瓊瑤一色嚴子陵釣臺歸路迷蹤跡
追惜燕然畫角寶籥珊瑚是時丞相虛作銀城換得當
此際偏宜訪袁安宅醺醺醉了任金釵舞困玉壺傾側
又是東君暗遣花神先報南國昨夜江梅漏洩春消息

法曲第二

青翼傳情香逕偷期自覺當年草草未省同衾枕便輕
許相將平生懽笑怎生向人間好事到頭少漫悔懊
細追思恨從前容易致得恩愛成煩惱心下事千種盡
憑音耗似此縈牽等伊來自家向道泊相見喜歡存問
又還忘了

右花草粹蕭

水龍吟

雪霏冰結霜凝是誰透得春工意南枝向暖江邊嶺上
獨先衆卉閑態幽姿綠苞紅蒂粉英金蕊念冰膚秀骨

人間要見除非是真仙子 羌管且休橫吹待佳人新

妝初試鸞臺晚鏡人花相對更何須比疎影橫斜暗香
浮動月低風細又豈知漸結枝頭翠玉有和羹美

右 御選歷代詩餘

章

淦

浦城人字質夫以叔得象蔭授官治平二年
試禮部第一歷知慶州渭州以平夏功擢樞
密直學士進龍圖端明學士拜同知樞密院事
請老授資政殿學士卒贈光祿大夫諡莊簡

水龍吟 柳花

燕忙鶯嬾春殘正堤上柳花飄墜輕飛點畫青林誰道
全無才思閑趁遊絲靜臨深院日長門閉傍珠簾散漫
垂垂欲下依前被風扶起 蘭帳玉人睡覺怪春衣雪

沾瓊綴繡床漸滿香球無數才圓却碎時見蜂兒仰粘
輕粉魚吞池水望章臺路杳金鞍遊蕩有盈盈淚右花

陳

瓘

延平人字瑩中元豐二年甲科歷任湖州越

州明州幕職建中靖國初召為右司諫極論
章蔡之奸崇寧中為會布所構除名竄合浦後赦
還歷移郴道台楚諸州安置卒於楚州紹興中賜
諡忠肅有了

齋集詞附

卜算子

身如一葉舟萬事潮頭起水長船高一任伊來往洪濤
裏潮落又潮生今古長如此後夜開尊獨酌時月滿
八千里

一落索

體上衣裳雲作縷不論寒暑世間多少老婆禪猶苦問
臺山路堪笑龐翁無趣臨行却住古人公案不須論
還了得如今否

減字木蘭花

大江北去未到滄溟終不住淮水東流日夜朝宗亦未
休香爐烟裊濃淡捲舒終不老寸碧千鍾人醉華胥
月色中

又

華胥月色萬水千山同一白南北相望獨醉香山舊草
堂淮岑妙境十載醺酣猶未醒一腹便便也讀春秋

也愛眠

卜算子

只解勸人歸都不留人住南北東西總是家勸我歸何處
去住總由天天意人難阻若得歸時我自歸何必
閑言語

又

黃了舊皮膚最是風流處多少紛紛陌上人不聽春鶻
語觸目是家山到了須拈取雲散長空月滿天好箇
還歸路

夢裏不知眠覺後眠何在試問眠身與夢身那箇能祇

對 醉後有人醒醒了無人醉要識三千與大千不在
微塵外

青玉案

碧空黯淡同雲遶漸枕上風聲峭明透紗窻天欲曉珠
簾才捲美人驚報一夜青山老使君留客金尊倒正
千里瓊瑤未經掃欺壓梅花春信早十分農事滿城和
氣管取明年好

驀山溪

扁舟東去極目滄波渺千古送殘紅到如今東流未了
午潮方去江月照還生千帆起玉繩低枕上鶯聲曉

錦囊佳句韻壓池塘草聲邇去年雲惱離懷餘音裊裊
倚樓看鏡此意與誰論一重水一重山目斷令人老

減字木蘭花

世間藥院只愛大黃甘草賤急急加工更靠硫黃與鹿
茸 鹿茸喫了却恨世間涼藥少冷熱平均須是松根
白茯苓

滿庭芳

擾擾匆匆紅塵滿袖自然心在溪山尋思百計真箇不
如閑浮世紛華夢影囂塵路來往循環江湖手長安障
日何似把魚竿 盤旋那忍去他邦縱好終異鄉關向

七峯回首清淚斑斑西望烟波萬里扁舟去何日東還
分攜處相期痛飲莫放酒杯慳

又 贈劉拐子

槁木形骸浮雲蹤跡一年兩到京華又還乘興往看洛
陽花聞道鞵紅最好春歸後終委泥沙忘言處花開
謝不似我生涯 年華留不住饑飡困寢觸處爲家這
一輪明月本自無瑕隨分冬裘夏葛都不會赤水黃芽
誰知我春風一拐談笑有丹砂

又

淮葉繽紛江烟濃淡別尊同倒寒暉未逢春信霜露惹

征衣往事元無是處何須待回首知非春鵲語從來勸
我常道不如歸 家山何處近江樓簾棟夕捲朝飛問
西江筍蕨何似鱸肥且置華胥舊夢忘言處千古同時
君知我平生心事相契古來稀

醉蓬萊

問東州何處境勝人幽兩俱難得狼山相望有高堂千
尺妙曲轟空綵雲翻袖奏壺天長日笑我飄然蓬窻竹
戶只延山色 擬棹觥船逕衝花浪直造瑤筵共醺仙
液仍乞蟠桃向廬山親植未舉江帆早逢淮雁問故人
蹤跡遠老池邊陶翁琴裏此情何極

臨江仙

聞道洛陽花正好家家庭戶春風道人飲去百壺空年
年花下醉看謝幾番紅 此別又從何處去風萍一任
西東語聲雖異笑聲同一輪深夜月何處不相逢

蝶戀花

海角芳菲留不住筆下風生飛入青雲去仙籙有名天
賜與致君事業安排取 要識世間平坦路當使人人
各有安心處黑髮便逢堯舜主笑人白首歸南畝

卜算子

咄咄汝何人眼在睂毛下明月相隨萬里來何處分真

假問著總無言有口翻成啞荆棘林中自在身即是知音者

右樂府雅詞

鷓鴣天

宜笑宜顰掌上身能歌能舞慧精神臉邊紅入桃花嫩
眉上青歸柳色新 嬌不語易生嗔尊前還是一番春
深杯百罰重拚却只為妖嬈醉得人

右花草粹篇

黃裳

南平人字冕仲元豐五年進士第一知福州
累遷端明學士卒贈少傅有演山集詞附

新荷葉

落日銜山行雲載雨俄鳴一頃新荷坐間總是秋聲烟
波醉客見快哉風惱娉婷香和清點為人吹在衣襟
珠佩歡言放船且向前汀綠蓋紅幢自從天漢相迎飛
鴻獨落蘆邊對幾朵繁英侑觴人唱乍聞應似湘靈

洞仙歌

世間言笑天上誰歡聚河漢涵秋靜無暑望丹霄杳杳
雲屋俄開綠會遠空引詩情萬縷 綵樓人送日今夕
無雙巧在靈絲暗相許爽氣御西風眾樂難尋乘槎看
鵲橋初度過幾刻良時早分飛向月下何辭十分香醕

夏初臨

夏景舒長麥天清潤高低萬木成陰曉意寒輕一聲未
放蟬吟但聞鶯友同音宴華堂綠水中心芙蓉都沒紅
妝信息終待重尋 清冷相照邂逅俱歡翠娥簇擁芳
醕頻斟笙歌引步登臨更向遙岑臥影沈沈好風來與
客披襟縱更深洞府遲歸紅燭如林

桂枝香

插雲翠壁爲送目入遙空見山色金鼎丹成去也晉朝
高客百花巖下遺孫在賦何人離塵風骨翠微緣近希
夷志遠洞天蹤跡 近却有爲龍信息怪潭上靈光雷
電相擊尤好風波乍靈鷲汀斜日倚闌白盡行人髮但

沈沈羣岫凝碧利名休事龍頭飛舸送君南北

錦堂春慢

天女多情梨花剪碎人間贈與多才漸覺瑤池漱灑粉
翅徘徊回旋不禁風力背人飛去還來最是清虛好處
遙度幽香不掩寒梅 歲華多幸呈瑞泛寒光一掬仙
子樓臺雖喜朱顏可照時更相催細認沙汀鷺下靜看
烟渚潮回爲遣青娥趁拍鬪獻輕盈且更傳杯

雨霖鈴

天南遊客甚而今却送君南國西風萬里無限吟蟬暗
續離情如織秣馬脂車去卽去多少人情望百里烟慘

雲山送兩城愁作行色 飛帆過浙西封域到秋深且
艤荷花澤就船買得鱸鱖新穀破雪堆香粒此興誰同
須記東秦有客相憶願聽了一曲歌聲醉倒拚今日

宴瓊林

紅紫趁春闌獨萬簇瓊英猶未開罷問誰共綠幄宴羣
真皓雪肌膚相亞華堂路小橋邊向晴陰一架爲香清
把作寒梅看喜風來偏惹 莫笑因緣見影跨春空榮
稱亭榭助巧笑曉妝如畫有花鈿堪借新醅泛寒冰幾
點拚今日醉猶飛竚翠羅幃中臥蟾光碎何須待還舍

又

霜月和銀燈乍送日樓臺星漢高下愛東風已暖綺羅
香競走去來車馬紅蓮萬斛開盡處長安一夜少年郎
兩兩桃花面有餘光相借 因甚靈山在此是何人能
運神化對景便作神仙會恐雲輶且駕思曾侍龍樓俯
覽笑聲遠洞天飛竚向來猶幸時如故羣芳未開謝

霜葉飛

誰能留得年華住韶華今在何處萬林飛盡但驚天籟
半空無數望消息霜催雁度佳人愁起雲垂暮就繡幕
紅爐去金鴨時飄異香柳腰人舞 休道行且分飛還
共樂一歲見景長是歡聚大來芳意旣與名園是花爲

主翠娥並尊前笑語來年管取人如故向寂寞中先喜
俄頃飛瓊化成寰宇

右 欽定詞譜

李彌遜

連江人字似之大觀三年進士歷知冀州漳
州累官起居郎南渡後試戶部侍郎以爭和
議罷歸卒諡忠肅

有筠溪集詞附

菩薩蠻

江城烽火連三月不堪對酒長亭別休作斷腸聲老來
無淚傾 風高帆影疾目送舟痕碧錦字幾時來薰風
無雁回

聲聲慢

木犀

龍涎燒就沈水熏成分明亂屑瓊瑰一朵才開人間十
里先知此花大卽不大有許多瀟洒清音較量盡謂勝
於茉莉賽得荼蘼 更被秋光掇送放些兒月照著陣
風吹惱煞多情猛拚沈醉酬伊朝朝暮暮守定儘忙時
也不相離睡夢裏膽瓶兒枕畔數枝

右樂府雅詞拾遺

十樣花

陌上風光濃處第一寒梅先吐待得春來也香消滅態
凝竚百花休漫妬

又

陌上風光濃處紅藥一番經雨把酒遶芳叢花解語勸
春住莫教容易去

青玉案

楊花儘教難拘管也解趁飛紅伴驄馬無情人漸遠沙
平淺渡雨濕孤村何處長亭晚 欲憑桃葉傳春怨莫
不似斜風倩雙燕縱得書來春又換只將心事分付
尖寂寞梨花院

一寸金

仙李盤根自有天潢藹芳裔更溜雨霜皮臨風玉樹紫
髯丹頰長生久視鶴帳琅書至長庚夢當年暗記邀歡

處回首西風漸喜秋英弄霜蕊 暫捲雙旌鳴金吹竹
高堂伴新戲對璧月流光屏山供翠碧雲乍合飛觴如
綴早晚巖廊侍終不負黃樓一醉丹青手先與翻堦萬
葉增春媚

寶鼎現

層林烟霽巨壁天半鴻飛無路雲斷處兩山之間十萬
琅玕環翠羽轉秀谷枕蘋花汀渚短柳疎籬向暮看外
壘牛歸橫舟人去平蕪鷗鷺 並遊不見鞭鸞侶只僧
前松子隨步回逕險凌風遐想小憩清泉依茂樹正筍
蕨過如酥新雨磯下游魚可數縱窈窕雲關長啟寂寂

誰爭子所 世上丹轂朱纓春夢覺南柯何許况榮枯
無定中有歡離愁緒儘笑我詫盤谷趣爲讀昌黎賦會
有人秣馬膏車相屬清尊一醕

右 欽定詞譜

蝶戀花

福州橫山閣

百疊青山江一縷十里人家路遶南臺去榕葉滿川飛
白鷺疎簾半捲黃昏雨 樓閣崢嶸天尺五荷芰風清
習習消袞暑老子人間無著處一尊來作橫山主

天仙子

次富季申韻

飛蓋追春春約佇繁杏枝頭紅未雨小樓翠幕不禁風

芳草路無塵處明月滿庭人欲去 一醉鄰翁須記取
見說新妝桃葉女明年却對此花時留不住花前語總
向似花人付與

水調歌頭

次向薌林見寄

不見隱君子 比三秋驚濤如許夢魂無路絕橫流
安得如雲長翮命駕不須千里上下逐君遊此計杳難
就注目倚江樓 西風裏多少恨寄歌頭飛奴接翼爲
我三度下南州正是天寒日暮獨釣一江殘雪風獵碧
莎裘和子浩然句一醉散千憂

念奴嬌

次王伯開韻

風簾弄影正閑堂書永香銷人寂軋軋鄰機芳思亂愁
入回文新織燕蹴巢泥鶯喧庭柳好夢無蹤跡那堪春
事背人無計留得 誰似愛酒南鄰岸巾坦腹醉踏西
山碧彩筆陽春傳雁足催我飛觴浮白老去情懷憑君
試看髯上秋霜色故園千里月華空照相憶

花心動 七夕

水館風亭晚香濃一番菱荷經雨簟枕乍閑襟裾初試
散盡滿軒衽暑斷雲却送輕雷去疎林外玉鈎微吐夜
未闌秋生敗葉暗催庭樹 天上佳期久阻星河畔仙
車縹緲雲路舊恨未平幽歡難駐洒落半天風露綺羅

人散金猊冷醉魂到華胥深處洞房悄南樓畫角自語

右詞綜

李

綱邵武人字伯紀政和二年進士靖康除兵部
尚書京營守禦使金師退知樞密院事旋出
爲河北宣撫使金人再至復起爲資政殿大學士
高宗卽位拜右僕射未幾落職紹興初歷除湖廣
宣撫使江西安撫大使與衆議不合改知潭
州辭不赴卒贈少師賜諡忠定有梁谿詞

西江月

贈友人侍兒

意態何如挺挺輕盈只恐飛飛華堂偏傍主人栖好與

安巢穩戲 攬斷樓中風月且看掌上腰肢謫仙詞賦

少陵詩萬語千言總記

右樂府雅詞拾遺

減字木蘭花 讀神仙傳

茫茫雲海方丈蓬壺何處在擬泛輕舟一到金鰲背上
游 瓊樓珠室千歲蟠桃初結實月冷風清試倩雙成
吸玉笙

采桑子 木樨二首

幽芳不為春光發直待秋風直待秋風香比餘花分外
濃 步搖金翠人如玉吹動瓏璵吹動瓏璵恰似瑤臺
月下逢

又

枝頭萬點妝金蕊十里清香十里清香解引幽人雅思

長 玉壺貯水花難老淨几明窻淨几明窻褪下殘英
簇簇黃

望江南 池陽道中

歸去好迂騎過江鄉茆店雞聲寒逗月板橋人跡曉凝
霜一望楚天長 春信早山路野梅香映水酒帘斜颺
日隔林漁艇靜鳴榔杳杳下殘陽

又 去沙陽過分水嶺

征騎遠千里別沙陽泛碧齋旁凝翠閣棲雲寺裏印心
堂回首意茫茫 分水嶺烟雨正淒涼南望甌閩連海
嶠北歸吳越過江鄉極目暮雲長

又

新閣就向日借清光
廣厦生風非我志
小窻容膝正相當
聊此傲羲皇
狨尾拂高挂
木繩床
老病維摩誰問疾
散花天女爲焚香
恰好細商量

又

雲棹遠南浦
綠波春日暖
風和初解凍
餌香竿裊好垂綸
一釣得金鱗
風乍起
吹皺碧淵淪
紅膾斫來鮮
更美白醪沽得旨
兼醇一醉武陵人

又

清晝永幽致
夏來多遠岸
叅差風颺柳
平湖清淺露翻

荷移棹釣烟波
涼一霎
飛雨洒輕蓑
滿眼生涯千頃浪
放懷樂事一聲歌
不醉欲如何

又

江上雪獨立釣魚翁
箬笠但聞冰霰響
蓑衣時振玉花空
圖畫若爲工
雲水暮歸去
遠烟中
茆舍竹籬依小嶼
縮鱗圓鯽入輕籠
歡笑有兒童

水調歌頭

同德久諸季小飲

律呂自相召
韶濩不難諧
致君澤物古來何世不須才
幸可山林高臥
袖手何妨閑處
醇酒醉朋儕
千里故人駕
不怕物情猜
秋夜永
更秉燭且啣杯
五年離索誰

謂談笑豁幽懷況我早衰多病屏跡雲山深處俗客不
曾來此日掃花逕蓬戶爲君開

又

物我本虛幻世事苦難諧功名富貴當得須是箇般才
幸有山林雲水造物端如有意分付與吾儕寄語舊猿
鶴不用苦相猜 醉中適一杯盡復一杯坐間有客超
詣言笑可忘懷況是清風明月如會幽人高意千里自
飛來共笑陶彭澤空對菊花開

又

如意始身退此事古難諧中年醉飲多病閑去正當才

長愛蘭亭公子弋釣溪山娛適甘旨及朋儕衰疾臥江
海鷗鳥莫驚猜 酒初熟招我友共一杯碧天雲捲高
挂明月照人懷我醉欲眠君去醉醒君如有意依舊抱
琴來尙有一壺酒當復爲君開

又 和李似之橫山對月

秋杪暑方退清若玉壺冰高樓對月天上宮闕不曾扃
散下淒然風露影照江山如畫渾覺俗緣輕弋者欲何
慕鴻羽正冥冥 世間法惟此事最堪憑太虛心量聊
假梨棗制頽齡但使心安身健靜看草根泉際吟蚓與
飛螢一坐小千劫無念契無生

又 太白畫像

太白乃吾祖逸氣薄青雲開元有道聊復乘興一來賓
天子呼來方醉酒面清泉微醒餘吐濕龍巾詞翰不加
點歌闋滿宮春 筆風雨心錦繡極清新大兒中令神
契兼有坐忘人不識將軍高貴醉裏指汚吾足乃敢尙
呵嗔千載已仙去圖像聳風神

又

花逕不曾掃蓬戶爲君開元戎小隊清曉佳客與同來
我爲新來多病且恁澆花菽藥隨分葺池臺多謝故人
意迂訪白雲隈 暮春月修禊事會蘭齋一觴一詠何

媿當日暢幽懷况是茂林修竹映帶流湍激山色碧
崔嵬勿復歎陳迹且爲醉金杯

玉胡蝶

萬古秣陵江國檣舟烟岸千里雲林故壘高樓凝望遠
水遙岑景陽鐘那聞舊響玉樹唱空有餘音感春心六
朝遺事蕭索難尋 森森甘泉法從弟兄芝玉顧我情
深契濶相思豈知今日共登臨對尊俎休辭痛飲增志
節須且高吟柳搖金斷霞輕靄殘照西沈

水龍吟

次章質夫韻

晚春天氣融和乍驚密雪烟空墜因風飄蕩千門萬戶

牽情惹思青眼初開翠睂乍展小園長閉又誰知化作
瓊花玉屑和榆莢漫天起 深院美人慵困亂雲鬟儘
從妝綴小廊回處鬢旣重疊輕拈却碎飛入樓臺舞穿
簾幕總歸池水悵青春又過年年此恨滿東風淚

又 送林商叟海道還閩

際天雲海無涯徑從一葉舟中渡天容海色浪平風穩
何嘗有颶鱗甲千山笙鐘羣籟了無遮護笑讀君佳闋
追尋往事須信道忘來去 聞說釣鯨公子爲才名鷁
書交舉高懷淡泊栢臺蘭省留連莫住萬里閩山不從
海道寄聲何處恨七年契濶無因握手與開懷語

喜遷鶯 自池陽泛舟

江天霜曉對萬頃雪浪雲濤瀾渺遠岫參差烟雨微茫
閱盡往來人老淺沙極浦凝望滿日餘霞殘照暮雲歛
放一輪明月窺人懷抱 杳杳千里恨玉人一別夢斷
無音耗手撚江梅枝頭春信欲寄算應難到畫船片帆
浮碧更值風高波浩幾時得向尊前消去許多煩惱

永遇樂

秋色方濃好天涼夜風雨初霽缺月如鉤微雲半掩的
爍星河碎爽來軒戶涼生枕簟夜永悄然無寐起徘徊
憑闌凝竚片時萬情千慮 江湖倦客年來衰病坐歎

歲華空逝往事成塵新愁似鎖誰是知心底五陵蕭瑟
中原杳杳但有滿襟清淚對蘭釭呼童取酒且圖逕醉

右 御選歷代詩餘

閩詞鈔卷一終

